



## PUT, U KRUG

### 1A.

on je rođen  
krajem dvadesetog vijeka  
po solarnom kalendaru  
ona je rođena  
početkom petnaestog vijeka  
po lunarnom kalendaru  
na nekom prostoru  
ta dva vremena su se srela  
možda na balkanu  
jer na balkanu se sve sreće  
vjerovatno na balkanu  
jer na balkanu se sve sudara

### 2A.

dok sam vukao torbu  
ugledao sam djevojku  
želio sam  
silno sam želio  
da je to stela  
mahao sam joj  
mahao  
stela pogledaj me  
hej vidiš li me  
to sam ja  
iza djevojke je odmahнула  
neka žena  
i ona je željela  
da sam ja neko

## 2B.

posljednju pjesmu rukopisa  
napisala sam pred spavanje  
ja sam pospana a tekst se budi  
ja spavam a tekst korača  
spavam  
tekst odlazi  
i razgovara  
razgovara  
upliće se  
ulančava  
spavaj  
govori tekst

## 2C.

sa svoje desne strane  
između sjedišta  
pronašao sam  
zaboravljen papir  
na papiru stihovi sa naslovom  
„zapis o hljebu i ispucaloj zemlji“  
potpisani imenom  
emanuel zrinski

hljeb je mirisao  
bio je još vruć

## 3A.

u džepu nosim pismo za a. m.  
i moj posao je da ono nikad ne stigne do njega  
i sve to o ljudima koji putuju vozom  
i nikad ne stignu kući  
o zabranjenim narodima  
zabranjenim imenima  
i zabranjenim riječima  
i kako se danas tri santimetra voli  
a sutra ni toliko  
jer takva su pravila,

a ja uvijek poštujem pravila  
sem kad je on u pitanju,  
kako svi živimo na još jednom mjestu  
a da to niko ne zna  
kako često putuje sa mnom  
dok spava u svojoj kući  
a na tom putu  
samo su moja pisma i džepovi  
i samo ja sam jedna od onih iz voza  
i ne stižem nikuda  
a on spava

### **7A.**

nešto sam izgubila  
možda ključeve  
možda rukavicu  
onu lijevu  
i šta će mi toplota  
samo na desnoj ruci  
nešto sam izgubila  
možda sam izgubila mora  
a gdje se traže mora  
i mora je uvijek premalo  
nešto sam izgubila  
možda kuće  
nečije tuđe kuće  
a šta ću ja u tuđim kućama  
i tuđe su kuće uvijek premale  
nešto sam izgubila  
nečega je uvijek premalo  
a ne sjećam se šta  
i kako onda da ga nađem

### **7B.**

s one strane kompjutera  
možda je živ neko  
možda tamo neko diše  
možda spava  
a možda i on u tebe gleda

s one strane kompjutera  
možda je prazna kuća  
možda su svi otišli vani  
na porodični ručak  
možda ih nema  
možda ih nikad nije ni bilo  
možda samo  
s ove strane  
neko diše  
i živ je

## 7C.

u meni je  
prije nekoliko dana  
iznenada začet  
jedan muškarac  
znatno drugačiji od mene  
drugačije plav  
drugačije lijep  
drugačije načitan  
drugačije drag  
pogledao je  
kroz moje oči  
i vidio mene  
kako prolazim nekom nepoznatom  
drugačijom ulicom  
gledajući u njega  
i ne prepoznajući  
sebe